

Balua na bhisi
gba Polo pi omabhuka na gudhu na
Kolito
Eli na kalanu

Balua na bhisi inde li Polo aye nani e pi okpala na Kolito, ani aye bhú nedhinga inde u du adje lio lie ne omabhuka na Dadjua na gudhu na Kolito de-o. Omabhuka koko na Dadjua gba Ebhe adu nani nagu Polo naali. Engú bini, ani asuno 'ndjá bua gba e ngú nadjé lie ne uo, ani atsia adje djali naali li nedhinga li engú bhomu-o andjia lie sunda uo-o.

Engú na bini bhú balua inde-e, Polo ngakpo 'ngú pindji nadjé lio ne okpala na Dadjua na Kolito, ani akpo ta ani agie 'ngú lie kpekpeke li sobho inde adu bhú Dadjua gba Ebhe-o, ne nagu inde li okpala na Kolito adu agu Dadjua gba Ebhe-e ne e-o. Polo atsia asuno di djali gba e, padhá de, anga egú inde ani agu e, amene me okpala dji di bua o amba u tsia dje di lio. Pipita-a, ani atsia ayo ka okpala na Dadjua gba Ebhe-e me u ha makiso ne bádha bua, ngubula nateteke omabhuka inde bhú ndibhili bhú Dadjua na Yudaya ne di. Bhú oalo na soso-o, Polo ngakpokpo 'ngú pindji kulu gba e na bhulu titima pi okpala koko na Kolito inde ngau lio me ni ne obhulu titima na kukulu gba Yesu ngaani. Padhá de, anga okpala ango-o adu apa me Polo ne bhulu titima na eu.

Ongbengbe ongú inde bhú bhuku inde-e ngae inde:

Eli na kalanu 1:1-11

Polo a la di-e Dadjua gba Ebhe na Kolito 1:12 - 7:16

Makiso pi omabhuka na Yudaya 8:1 - 9:15

Nakpokpo 'ngú gba Polo ne angu maka bhulu titima
gba Yesu 10:1 - 13:10

Eli na soso 13:11-13

Polo yi omabhuka na gudhu na Kolito mayi

¹ Ma aye balua inde-e ngama Polo bhú dabili bini ne ndai ní Timoté. Ma aye pi yi omabhuka na Dadjua gba Ebhe inde bhú gudhu na Kolito di ne pi yi obhende bhú ndu doto na Akai-e libhomu. Ebhe amene ngae me ma du ne bhulu titima gba Yesu Kilisito. ² A ayo me Ebhe 'Dyi ní ne Ngámá Yesu Kilisito suno bádha bhú 'bu gba o-o pi yi, amba u ha di guo 'ngú pi yi.

Omabhuka na Kolito ngazu likabhu bhú dabili bini ne Polo

³ A ayo me u toko Ebhe. A ko 'dyi Ngámá gba ní Yesu Kilisito. A ko 'dyi ní inde abedhe ne ndjinga bedhe. A ko Ebhe inde ngateteke bua kpála bhú ndu 'ngú hana. ⁴ Aní ngateteke bua ní bhú ndu olíkabhu gba ní-e hana, ngubula me ní teteke bua okpála bhende ngazu likabhu-o, li kpadji na angu inde, nganí makpe, ní asia e ka anio. ⁵ Maka ya nde lie ngazu likabhu ne Kilisito na paká paká-a, aní bhadi ngateteke bua ya na paká paká. ⁶ I du me ya nde bhú likabhu-o, a ko ngubula me yi sia angu di ne mukobho. I du me bua ya nde akθ-o, a ko ngubula me yi sia di angu. Angu ango-o ngaha pi yi nakibila ngua olíkabhu inde ya nde ngakibila e-o. ⁷ Ya nga'o to ya me Ebhe atéteke yi mateteke. Padhá de, anga ya ambila ndjindji me yi ngazu likabhu bhú dabili bini ne ya. Li Ebhe akó bua ya lie-e, bua yi akó bhadi moko.

⁸ Ondaise ya, ya akunda me yi mbila ngua likabhu inde ya azu e bhú ndu doto na Adjia* ndjindji. Ya azu likabhu naali, likabhu ango-o aha angu ya maha. Ya du abhundja de me ya akóto bhúbhú makoto de. ⁹ Ya adu abhundja li bua ya me ekpí gba ya-a ale. La-a, engú bhomu-o akolo li ya ngubula me ya a'ó nabhuka gba ya-a bhú ya makpe de, ya 'o bha bini bhú Ebhe kpi e kpi. Aní ngazuku okpála inde amu-o ngae. ¹⁰ Aní agbegbe ya bhú nakpi bhomu-o ngae. Aní agbégbé matá ya bhú okoko magbegbe. Ya la di nga'o 'to ya me aní agbégbé galikpe ya bhúbhú magbegbe. ¹¹ Ebhe améne bhobhomu-o, i du me yi nde akpòtso liyi ne ya bhú dabili bini bhú mayo-o. Abhomu-o, nedhinga li Ebhe adjé mayo gba yi-e lie, aní tsia há bádha bhú 'bu gba e pí ní padhá, li okpála bhelé tsia gie di heni pí aní.

Polo apa me ni nú nga bhú Kolito mbia inde-e de

¹² Ehe inde ya nde ka e bhú djali ngae inde: bua ya ngaziba me ya adhuku bhú ká okpála ne nakò liya ne kuto bhú dabili bini ne nawo 'ngú de. Ebhe akunda me ya dhuku bhú ká yi moko. Ya dhuku bhú ka yi ne imbilangu inde i yie ka okpála de. Engú bini, ya ngadhuku ne bádha bhú 'bu li Ebhe ngaha e pí ya ngae. ¹³⁻¹⁴ A ayo me yi mbila engú bhomu, anga bhú obalua ya aye e pí yi-e, ya aye bha engú inde yi ti da natanga e, yi ti di da nakò mboli e ndjindji. Nakolo pí mbia inde-e, yi dje nga ya má kpulukutu de! Engú bini, ma abhundja me yi ahólo nadge ya má kpulukutu madje! Abhomu-o, li 'kpí li Ngámá Yesu agó lie, yi akpí djali li 'ngú gba ya maka ya nde di lie ngakpi djali li 'ngú gba yi-o.

* 1:8 1:8 Adjia: A ko ndu doto adu nani bhú kuti na Tiliki na naki-o. Efeso du nani ne 'ngbé gudhu na kuti ango-o ngae.

¹⁵ Ma adu nako ne nabhuka bhú 'ngú bhomu-o. Kaka-a, ma adu akunda me ma apu agba yi bhutsibhutsi bhisi, amba yi sia di bádha bhú 'bu bhutsibhutsi na bhisi. ¹⁶ A akunda napa me ma akunda nako nanu agba yi kala nanu bhú Makedonia.† Pipita-a, ma adu di akunda me ma gie matálima agba yi ngubula me yi teteke ma ngubula nanu bhú Yudaya.

¹⁷ Nedhinga ma apa lie pi yi me ma améne mo-o, ma apa ne 'li ma bhisi bhisi? A mo-o ade. Nedhinga ma nga'o oekpa gba ma-a lie, ma'o li mabhundja inde ayie ka ma makpe de, ngú napa me ma aziba engú ne nayayala bhú dabilí bini. ¹⁸ Ebhe apá li ma ngae me engú ma apa e pi yi inde-e, ma pa ne eli bhisi bhisi de. ¹⁹ Padhá de, anga Yesu Kilisito, Ndili gba Ebhe inde ya akpokpo engú gba e pi yi-e, ngama Polo, ne Sila bhú dabilí bini ne Timoté, aní go nani ngú naziba 'ngú ne nayayala bhú dabilí bini de. Engú bini, aní memene engú inde aní ngapa e-o.

²⁰ Ndu 'ngú li Ebhe apa me ni améne e pi ní-e, améne lie kabula Yesu. Kaka-a, ya ngaziba me adu moko ne 'li aní ngú nadhogø Ebhe. ²¹ Ebhe abhu ya ngae makpe, la di-e, ngaani makpe ngato angu bhú ya bhú dabilí bini ne yi li kpadji gba Yesu Kilisito-o. ²² Aní a'o di Bu Bhobua gba e li bua ní ngú nasuno me ní ne naani okpála. Maka aní aha Bu Bhobua gba e lie pi ní-e, ní ambila bhadi me aní ahá di ndu ohe koko inde aní apana e pi ní-e maha.

²³ Ne 'li Ebhe, li ma pa eu-o, Ebhe de bhøø ma. Kabula nalila‡ yi-e, ma kunda nanu agba yi bhú Kolito mbia inde-e de. ²⁴ A ko de me ya ngakunda nau ngámá pí

† 1:16 1:16 Makedonia: A ko ndu doto bhú kuti gba oGiliki. A li pápá na Abebe. ‡ 1:23 1:23 Nalila: Polo akunda me ni 'o nedhinga pi okpála na Kolito ngú nadjí bua o li 'ngú u amene e li aní-o.

nabhuka gba yi-e de ngú napa me yi bhuka bha bini bhende ya ngakunda e de. Padhá de, anga yi alu kpekpeke bhú nabhuka gba yi-o. Ya akunda mangbo namene kulu bhú dabilì bini ne yi ngubula me bua yi du bhú djali.

2

¹ Abhomu-o, ngama-a, ma apa li bua ma me a ndjindji ade me ma nu nga agba yi-e de. Padhá de, anga ma asiti matá bua yi ne toto* ² Li ma ha siti pi bua yi-e, a há matá djali muma da? Padhá de, anga kpála inde li bua e asiti-e, tí matá da naha djali muma de. ³ Kaka-a, ma aye balua bhomu-o pi yi, maka ma aye nako lie bhú balua gba ma na kalanu-o.† Ma kunda nako de me ma kolo agba yi-e, bua ma de siti matá ka okpála inde ayo nako me u ha djali muma-a de. Ma ambila na paká me nedhinga ma nde lie bhú djali-e, ndu yi hana di bhú djali. ⁴ Nedhinga ma aye balua bhomu-o lie pi yi-e, bua ma adu me a nde abedhe ne likabhu di ne tsulu bedhe. Ma aku belegu egbá. Yi abhúndja de me ma aye balua bhomu-o pi yi ngú na siti bua yi-e de. Ma aye mangbo ngú nasuno pi yi lele mukunda ma nde pi yi ne e ko.

Polo apa me u mbu li kpála inde amene siti 'ngú-o

⁵ Li 'ngú bhende atsia kpála inde amene siti 'ngú-o, aní asiti bua ndu yi hana ane ma mane. Engú bini, ma kunda napa 'ngú tété ne na'e'e bhú da e ma'e de. Aní siti bua

* 2:1 2:1 Ne toto: Polo anu nani bhú gudhu na Kolito, suka mabhuka bini na Dadjua gba Ebhe-e atsia asobho aní, engú bini Dadjua gba Ebhe-e tsia gama 'ngú tété de. † 2:3 2:3 Balua na kalanu: A ko bha ndju balua na bini gba Polo pi omabhuka na Kolito de. A ko balua inde angita pi ní-o.

ndu yi hana de, la-a, ani asiti bua té okpála bedi bhú ká yi. ⁶ Okpála bhelé bhú ká yi ambe bhú 'ndji kpála bhomu-o ambe. Ma abhundja me a pise moko. ⁷ A ayo ibili mangbo mbia inde-e me yi suno bádha bhú 'bu pi ani, amba yi to masi bhú ani, ngubula me likabhu ahá angu ani má tsitsidha de! ⁸ Kaka-a, ma ayo ka yi me yi suno mukunda gba yi-e pi ani. ⁹ Ta naye balua gba ma na kalanu-o pi yi-e, a ko ngubula nale yi, amba ma mbila me yi nani bedhe ngú namene ndu 'ngú inde ma apa e pi yi-e hana. ¹⁰ Yi suno bádha bhú 'bu pi kpála-a, ma asúno bhadi bádha bhú 'bu pi ani. Li ma mbu li siti 'ngú-o, i du me engú na sisiti ngú nambu tété ka ma nde uu-o, ma ambú tété ka yi kala Yesu Kilisito . ¹¹ Ma amene mo-o ngubula me Satana apíte ní li 'ngú bini de. Padhá de, anga ní mbila engú inde ani akunda namene e ndjindji.

Polo adu akunda me Tito go bhaka ni bhú gudhu na Tuluasi ne ngali gba omabhuka na Kolito

¹² Nedhinga ma akolo lie bhú gudhu na Tuluasi ngú nakpokpo Bádha Ngali gba Yesu Kilisito-o, ma au me Ngámá abhulu 'bhø bhoti muu ngú nakpokpokpo abhulu. ¹³ Engú bini, ma azu likabhu li bua ma naali anga ma bhaka ndai ma Tito de. Kaka-a, ma abhana lima pi okpála na Tuluasi, ma atsia atapa bhú ndu doto na Makedonia.

Polo ngadhø Ebhe kabula kulu gba e-o

¹⁴ Engú bini, a ayo me ya dhø Ebhe, anga ani ngakø pi ya ndu 'kpí hana kalanu bhú galasisi[‡] inde ngasuno

[‡] 2:14 2:14 Bhú galasisi: Polo ngabhundja pindji 'ngbé ngámá gba osudha inde ngagie lie bhú 'gú me ani agboko 'gú-o agboko. Okpála ngabhia kuo li ani ne natsulu mungotsi.

me Yesu Kilisito agboko 'gú pí 'ndji ndu 'he hana agboko. Anì ngatima ya ne ndu bìlì hana ngubula nasuno Yesu Kilisito pí okpála. Nambila anì-e, a maka bádha se 'he inde ngapu ne ndu bìlì hana. ¹⁵ A ko paká. Ya maka mungotsi inde lì se e nde babadha, inde lì Yesu Kilisito aha e pí Ebhe. Se mungotsi ango-o ngapu pí okpála inde lì Ebhe ngakobho o di ne okpála bhende ngangita. ¹⁶ Pí okpála bhende bhú ngita-a, se mungotsi bhomu-o sisiti, pí uo-o, se mungotsi ango-o ngatima uo bhú kuo. § Pí okpála bhende lì Ebhe ngakobho o-o, se mungotsi bhomu-o babadha, a ngaha pí uo mukobho. A moko! A lì nakpokpo Bádha Ngali-e ne tata na ngbéngbé. A tí da namemene da? ¹⁷ Ya maka okpála koko bhelé inde ngakpokpo eli gba Ebhe-e lì nasia tia ade. Engú bini, ya mangbo ngakpokpo 'li Ebhe kala anì bhú ngbili 'ngú , bhú nakpøtsø lio ne Yesu Kilisito.

3

Omabhuka ne balua inde lì Yesu Kilisito aye e-o

¹ Engú inde ma aye e bhomu-o akunda napa me ya akunda matá na'o liya ngaya makpe abhúlá? Ya ne gumu balua ngú nasuno pí yi me ya ne obhulu titima gba Yesu ade. Ya di ne gumu ade me yi ye balua pí ya ngú nadhuku ne di me ya du nasusuno pí okpála. La pí obhulu titima koko-o, a ayo balua. Ya maka uo ade! ² Yi ne balua gba ya-a inde lì Yesu Kilisito aye e lì bua ya-a ngayi makpe. Ndu kpála hana tí da nambimbila ne natatanga. ³ A ko paká, a mbámbá me yi ne balua inde lì Yesu Kilisito aye e ngae, anì atsia atima sakpa ya. Anì

§ 2:16 2:16 Bhú kuo: Bhú galasisi-e, adu nani ne osudha inde agboko 'gú, adu la di ne obhende u agboko o bhú 'gú-o. Obhende u agboko-o, adu nani nadjeko kuo.

ye ne 'ngu balua de. Aní aye mangbo ne Bua gba Ebhe inde uu-o. Aní ye pí opapala teme† de, aní aye mangbo lí bua okpála-kuti.†

Polo ngamene kulu gba Ebhe-e lí lele gandja na mbia

⁴ Ya ngabhuka bhú ongú bhomu-o anga Yesu Kilisito apana pí ya me Ebhe atima ya ngae. ⁵ A ko de me ya ngamene ngua kulu bhomu-o ne angu gba ya makpe-e de, ya mene bhú 'ndji ya de. Ebhe ngaha angu bhomu-o pí ya ngú namemene ngae. ⁶ Ebhe aha angu pí ya ngú nadu okpála na kulu na gandja na mbia-a ngae. Gandja ang-o lu pí lílí inde u aye nani e maye-e de, alu mangbo pí Bu Bhobua . Lílí inde u aye nani e ngato kpála bhú kuo. La-a, Bu Bhobua naae ngaha pí okpála mukobho.

Sangu na gandja na mbia ane bhende na didili-e mane

⁷ Nedhinga lí Ebhe aye nani lílí lie pí opapala teme ngú nahaha pí Moidje-e , sangu gba Ebhe-e adu asu bhúla aní. Abana lí zizi adu andjia lie bhúla Moidje-e, a adu nga bha kpekpeke. Omatsalaele tí nani belegu da natsia bhúla aní de.† Ní au me belegu lí gandja na didili adu ato kpála lie bhú kuo-o, adu bhadi ne sangu. ⁸ I du mo-o, gandja na mbia inde lí Ebhe ngaha Bu Bhobua gba e pí ní bhú e asúno sangu gba Ebhe ane mane. A mo-o adi! ⁹ I du me kulu gba Moidje inde adu nato okpála bhú kuo nde nani ne sangu-o, asi la masi pí kulu na mbia gba Ebhe inde ngamene me okpála du ngbingbili-e, a asúno sangu gba aní-e ane mane dí! ¹⁰ Ní tí belegu da napa me sangu inde akoto nani bhomu-o matá ngau lie ka sangu na naki inde-e ade, anga a ane bhe nani na kalanu-o mane. ¹¹ Padhá de, anga i du me gandja na didili, inde akoto nani ngú

† 3:3 3:3 Tsia bhú Eki. 24:12. † 3:3 3:3 Tsia bhú Djlm. 31:33.

† 3:7 3:7 Tsia bhú Eki. 34:29.

nedhinga bedi-e nde akoto ne sangu-o, asi la masi maka gandja na mbia inde ngabhue duduama ne duduama-a?

¹² Ya ne nabhuka bhú gandja na mbia-o. Kaka-a, ya ti da napa 'ngú pi yi mbámbá. ¹³ Ya mene maka Moidje de. Padhá de, anga Moidje adu nani nabuku bhúla e ne bongo ngubula me omatsalaele aú lele maka zi sangu gba Ebhe inde adu asu bhúla ani-e du abulu lie de-o. Zi sangu ang-o adu la bha nani ngú nedhinga bedi. ¹⁴ Omatsalaele ang-o, agbite nani bua o má ki! Ngú nakolo pi naki-e, li ongisi gba uo du natanga ongú inde u aye e bhú gandja na didili-e, u kə mbolimboli de. A mana mugito me bongo ngabuku tata-a pi uo. Bongo bhomu-o bha bini nga'e lie me kpála nde akpətsə lie ne Yesu Kilisito. ¹⁵ Abana pi naki, ndu nedhinga hana inde li omatsalaele ngatanga obhuku gba Moidje lie, u kə mbolimboli de.

¹⁶ Engú bini, maka u aye bhú bhuku gba Ebhe-e lie me, li kpála dji bhúla e li pápá gba Ngámá Ebhe-e, oehé inde li pála bongo abuku e ú lie mbámbá. ¹⁷ A ko paká, Ngámá Ebhe-e, a ko Bu Bhobua. La-a, bili li Bua gba Ngámá-a nde li e, okpála inde oo bhú ngu o, a ko matá obalise na líli gba Moidje de. ¹⁸ Ndu ní hana inde li bongo nabuku bhúla ní-e ayie bhúla o ayie, ní ngasuno sangu gba Ngámá maka bhú bitolobi. Abhomu-o, Ngámá inde di Bu Bhobua-a ngadji ní me ní kolo maka ni, ne sangu inde nganu bha ne kalanu.†

4

Ebhe ngasuno angu gba e bhú bhuku gba obalise gba e-o

† 3:18 3:13-18 Tsia bhú Eki. 34:29-35.

¹ Ebhe bhú bádha bhú 'bu gba e aha pi ya kulu nakpokpo Bádha Ngali . Kaka-a, ya gie liya ne sidi de. ² Ya ayala ndu 'ngú na pepe, i du di-e bhe na numu-o hana. Ya mene ehe bhú kali de, ya kpɔtsɔ di 'li Ebhe bhú dabili bini ne engú na eu de. Ya mangbo ngasuno ngbili 'ngú pi okpála mbámbá. Ya ngamene mo-o kala Ebhe ngubula me okpála hana mbila me lele nadhuku gba ya-a ngbingbili. ³ La-a, i du me Bádha Ngali inde ya ngakpokpo e nde mbámbá ade-e, a mbámbá ade bha bini pi okpála inde ngangita-o. ⁴ U ngabhuka ade anga Satana , ebhe na doto inde-e angbingi imbilangba gba uo-o angbingi. Ngaani ebhe ango-o amene me u aú zi 'kpí inde bhú Bádha Ngali-e de. A ko zi 'kpí na sangu gba Kilisito . Ngaani-e, ani mana Ebhe libhому. ⁵ Nedhinga ya ngakpokpo Bádha Ngali-e lie, a ko de me ya ngakpokpo engu gba ya makpe-e de. Ya ngakpokpo me Yesu Kilisito ne Ngámá ngae. La pi ya-a, ya bha naaya ne obalise gba yi kabula ani. ⁶ Padhá de, anga Ebhe apa nani me: «Zi 'kpí su bhú bitil†» Ani amene ngae makpe me zi 'kpí gba ni-e su li bua ya ngubula me ya mbila sangu gba ni inde ngasu bhúla Yesu Kilisito-o.

⁷ Oehe na babadha bhому-o, Ebhe a'o bhú ya. Engú bini, ya bhubhuku maka madakpa. Ebhe amene mo-o ngú nasuno me angu na ngangamba bhому-o yie bhú ya de, ayie mangbo bhú ni. ⁸ Ya ngazu ndu ngua likabhu hana, engú bini, likabhu bini ha nga angu ya de. Bua ya angamba, engú bini, ya ngaholo bua ya. ⁹ Okpála ngato mbolo li ya, engú bini, Ebhe 'o ká ya de. U agbo 'i ya, engú bini, u bhɔɔ ya de. ¹⁰ Ya ngadhuku ne kuo ndu 'kpí hana sa so ya maka Yesu, ngubula me mukobho gba ani u di lie bhú lele nadhuku gba ní-o. ¹¹ Ndu nedhinga hana ya

† 4:6 4:6 Tsia bhú Dje. 1:3.

nde lie bhú mukobho-o, kuo de ya masikpe kabula Yesu. Abhomu-o, u tsia tí da di nau mukobho gba ani-e bhú lele nadhuku gba ní píla doto-o. ¹² Kaka-a, kuo ngamene kulu bhú ya ngubula me mukobho du namene kulu bhú yi.

¹³ Bhuku gba Ebhe-e ngapa me: «Ma abhuka mu Ngámá, kaka-a, ma atsia agama 'ngú.†» Ngaya di-e, ya abhuka Ngámá, kaka-a, ya atsia agama di 'ngú. ¹⁴ Ya ambila me Ebhe inde azuku Ngámá Yesu bhú ká okpála inde amu-o, azúku di ya bhú dabilì bini ne ani. Ani tsia 'ó di ya bhú dabilì bini ne yi de e. ¹⁵ Ndu 'ngú ya ngakibila e hana-a, a ngubula yi, amba ngayi okpála inde li Ebhe ngasuno bádha bhú 'bu gba e pí yi-e, yi du nabe ndu yi ane mane. Abhomu-o, mayo gba yi nagie heni pí ani-e tsia bé di ndu e. Bhobhomu-o tsia há sangu pí Ebhe.

¹⁶ Kaka-a, ya gie liya ne sidi de. Abana li kute ya du nandala-a, ya ambila me bua ya ngasia angu na mbia ekpí bini ne bini hana. ¹⁷ Likabhu ya ngazu e mbia inde-e mbomboye, ní tsia sangu na ngbéngbé inde ngadjeke ní-o. Sangu ango-o ane ndu 'he hana, a la di ngabhue duduma ne duduma. Olikabhu ní ngazu e inde-e ngaleke ní ngú nasia sangu bhomu-o. ¹⁸ Padhá de, anga ní nga'o 'to ní 'to engú i u lie ne djila de-o. Ní 'o 'to ní 'to engú inde ngau lie ne djila de-e de. Ehe bhende ngau lie ne djila ngabhue naali ade, engú bini, ehe i u lie ne djila de-e, ngadu duduma ne duduma.

5

Kute na mbia inde li omabhuka asía e abhúlá-o

¹ Ní mbila hana me li eti inde ní nde bhú e kpi-e, a ka ní ne eti koko abhúlá a akunda napa me, ekpí bini, ní akpí

† 4:13 4:13 Tsia bhú Ets. 116:10.

makpi, ní tsia 'ó ka kute na doto inde. Eti li Ebhe aleke e pi ní-e, okpála yiki ngao de. Eti ang-o adú duduma ne duduma. ² Nedhinga ní nde lie bhú kute inde-e, ní ngalopolo liní anga gumu gba ní na ngbéngbé-e me ní dyi kute na abhúlá maka bongo na mbia. ³ Nedhinga ní a'ó ka kute na doto inde-e lie, ní dú abhúlá mandí kute de. Ní asía kute na mbia. ⁴ Ní mbila hana me ní nde nga bha lie bhú kute na doto inde-e, ní ngalopolo liní mugito me ní abi tili 'he. A ko de me ní ngagili nadu mandí kute-e de. Ní mangbo ngagili me ní dyi kute na abhúlá ngubula me mukobho ha angu ehe bhe na kukuo-o. ⁵ Ebhe aleke ní ngubula mukobho ang-o ngae makpe. Aní atsia aha ngaiza Bua gba e pi ní bhú ka ohe inde aní aleke e pi ní-o.

⁶ Ní mbila hana me, nedhinga ní nde lie bhú kute na doto inde-e, ní nga bha tsutsu de bili li Ebhe Ngámá nde lie-o. Abana inde lie mo-o, ní abedhe ndu 'kpí hana ne masi. ⁷ Padhá de, anga ní ngadhuku li lele nabhuka makpe, ní dhuku li lele nakpata engú ní ngau e ne djila ní-e de. ⁸ A moko, ya abedhe ne masi bedhe. Ya la di ne gumu nayie bhú kute inde-e ngú nanu nadu dengo Ngámá gba ní-o. ⁹ Engú inde li bua ya ngae inde, a ayo me ya mene engú inde anga li Ebhe, abana ya du bhú kute inde, abana ya yie bhú kute ang-o. ¹⁰ Padhá de, anga a ayo me ndu ní hana ní ze bhú djila Yesu Kilisito ngú napa me aní kodho 'ngú gba ní-o. Abhomu-o, li kpála ne kpála tsia sía ehe inde atí ne engú li aní amene e li nedhinga aní adu lie bhú kute na doto-o. Kpála ne kpála asía makalá na bádha 'ngú, i du di-e bhe na siti 'ngú inde aní amene e-o.

Ebhe nga'i okpála bhú 'li ya

¹¹ Ya mbila hana me namanga Ebhe ne ni-ie. Kaka-a, ya ngagili me ya to bhú 'ndji okpála me u bhuka Bádha Ngali ya ngakpokpo e-o. Kala Ebhe-e, ní ti da nawo liní de. Ma ngabhundja la di me kala yi-e, ma wo lima de. ¹² Ya kunda matá de me ya kpokpo 'ngú gba ya-a pi yi ngaya makpe de. Engú bini, ya ngakunda na'o yi me yi du ne gindaginda li 'ngú gba ya-o. Abhomu-o, yi ti da nagie 'ngú pi okpála inde ngau ngbengbe ongu bhende i ngau lie mbámá, inde i tsia 'kpí li 'ngú bhende li bua kpála de-o.

¹³ I du me ya nde ne obhulu pele maka li okpála koko ngabhubhundja lie-e, a ko kabula Ebhe. I du me ya nde ne obhulu pele ade-e, a ko ngubula nateteke yi. ¹⁴ Engú inde ngatima ya me ya mene kulu inde-e ne kekele-e, a ko mukunda li Yesu Kilisito nde ne e pi ya-o. Ya ambila ndjindji me Yesu Kilisito akpi mada ndu okpála hana. Kaka-a, bhú djila Ebhe-e, ndu okpála hana amu bhú dabili bini ne ani. ¹⁵ Ani akpi ngubula ndu okpála hana, amba ndu obhende bhú mukobho adu matá akobho bhú ngu o de, engú bini, u du akobho pi kpála inde akpi, atsia azuku pi uo-o.

¹⁶ Kaka-a, ya matá ngatsia kpála ne djila bhe na kpála-kuti ade. A ko paká ya adu nako natsia Yesu Kilisito ne djila bhe na kpála-kuti, la mbia inde-e, ya matá ngatsia ani mo-o ade. ¹⁷ Nedhinga li kpála akpøtsø lie lie ne Yesu Kilisito-o, ani akolo kpála na mbia. Lele dasundu gba ani na kalanu-o andjia. A ibili bhú ani ne lele dasundu na mbia. ¹⁸ Ebhe ngamene ndu 'ngú bhomu-o hana ngae. Ani atima Yesu Kilisito me ani go to guo 'ngú sunda ní ne o. Ani aha kulu bhomu-o pi ya ngae me ya nu gbele okpála koko de ni, amba ni to guo 'ngú sunda ni ne uo. ¹⁹ Padhá de, anga Ebhe adu namene kulu ngu nato guo

'ngú sūnda o ne okpála-kuti li kpadji gba Kilisito. Aní tsia matá siti 'ngú gba uo de. Abhomu-o, Yesu Kilisito atsia atima ya me ya kpokpo pi okpála lele maka a ayo lie me u sia guo 'ngú sūnda o ne Ebhe-o.

²⁰ Bbobhomu-o akunda napa me Yesu Kilisito atima ya ngae makpe. A na paká me Ebhe nga'i okpála bhú 'li ya. Kaka-a, ya ngayo ka uo ne 'li Yesu Kilisito me, u 'o me Ebhe to guo 'ngú sūnda o ne e. ²¹ Yesu Kilisito mene nani siti 'ngú belegu de bini. Engú bini, Ebhe a'o kili siti 'ngú gba ní-e li 'ngbu ani, ngubula me li kpadji gba ani-e, ní sia ngasa nakolo ngbingbili bhú djila Ebhe.

6

¹ Ya ngamene kulu bhú dabili bini ne Ebhe. Inde lie mo-o, ya ngayo ka yi me, yi aú bádha bhú 'bu li Ebhe apana e pi yi-e padhá de. ² Padhá de, anga Ebhe apa bhú Bhuku gba e me:

«Nedhinga akolo lie me ma mene bádha 'ngú pi yi okpála gba ma-a, ma adje yi.

Nedhinga akolo lie me ma kobho yi-e, ma ateteke yi.†»

Ondaise ma, yi gbo 'dje yi, a ko mbia inde-e nedhinga na babadha, a ko nedhinga na mukobho.

Likabhu li Polo azu e asuno me a ko kukulu bali gba Ebhe

³ Ya kunda namene engú bini de inde améne me okpála ti ka e-o, anga i du mo-o de-e, u pá 'ngú li kulu gba ya-a sisiti. ⁴ Bhú ndu 'ngú ya ngamene e hana-a, ya akunda mangbo nasuno pi okpála me ya ne obalise na kukulu gba Ebhe. Abana ya du nasia mangua likabhu dho-ie,

† 6:2 6:2 Tsia bhú Isa. 49:8.

abana u **du** nato mbolo li ya, ya bha ngakikibila makibila. ⁵ U abhi ya, u amba ya bhú tikpu, u ato kpéke ndji bhú 'ndji okpála me u mene ya sisiti. Ya abhøø kuo ya ne kulu masikpe da napa me ya asía belegu nedhinga nala ne nazu 'he de. ⁶ Bua ya kala Ebhe bubu, ya ngasuno me ya ambila ongu gba Ebhe-e má kpulukutu! Ya ne 'ndjá bua, ya ne bádha bua, Bu Bhobua bhú ya, ya la di ne mukunda na kuku.

⁷ Ya ngakpokpo kuku 'ngu pi okpála bhú angu gba Ebhe. Lele bádha nadhuku gba ya-a pi ya maka tia 'gu ngu naha 'gu ne obhulu yala gba ya-o. A di pi ya maka kopí ngu nalila liya ne di sakpa obhulu yala gba ya-o. ⁸ Okpála koko ngamanga ya, okoko ngau ya bhú djila o padhá. Okpála koko ngatoko ya, okoko ngasobho ya. Okpála ngau ya mugito me ya ne obhulu eu, ya nde la ngapa kuku 'ngu-o. ⁹ Okpála koko ziba de me ya ne obhulu titima gba Yesu-o de, engu bini, okpála bhelé ngaziba ya. Okpála koko ngau ya mugito me ya ne omakpiakolo, ya nde la bhú mukobho-o. U ngato mbolo li ya, engu bini, ya mu de. ¹⁰ Abana li bua ya ngabi likabhu lie ka okpála naali-e, ya bha ndu 'kpi hana bhú djali. Ya bhú ndibhili, engu bini, ya ngamene me okpála bhelé kolo obhulu tia kala Ebhe. Ya ngau liya bhú djila okpála mugito me ehe bini ka ya píla doto inde-e ade. La-a, bhú ngbingbili-e, ndu 'he hana ne naaya 'he.

¹¹ Ngayi ondaise ya na Kolito-o, ya agama 'ngu pi yi mbámhá. Ya wo engu inde li bua ya-a belegu de bini. ¹² Pi ya-a, ya gbite bua ya pi yi de, yi agbite mangbo bua yi pi ya ngayi. ¹³ Ma ngagama 'ngu pi yi mugito me yi ne ongisi ka ma. Ma ngapa pi yi me: «Yi gie mukunda ya nde ne e pi yi-e pi ya. Yi awó engu inde li bua yi-e pi ya de.»

Yi akpótsə liyi ne omupagano de

¹⁴ Yi akpótsə liyi bhú dabili bini ne omupagano ngú namene ehe ne uo de. Ehe inde ngbingbili-e ti da nakpətsə lie bhú dabili bini ne ehe na sisiti-e lele pi? Zi 'kpí ti da nakpətsə lie bhú dabili bini ne biti lele pi? ¹⁵ Yesu Kilisito ti da nadjé lio ne djabulu lele pi? Kpála inde abhuka Yesu-o ti da nadu ne mabhundja bini ne kpála bhende i bhuka de-e uu? ¹⁶ Nganí-e, ní ne 'ngbé 'ti Ebhe inde uu. 'Ngbé 'ti Ebhe ti da nakpətsə lie ne 'ti atolo belegu de bini. A maka li Ebhe apa lie li 'ngú gba omaha e me:

«Ma adú bhú ká uo,

ma tsia dhúku bhú dabili bini ne uo.

Ma adú ne Ebhe gba uo, u tsia dú ne omaha ma.†»

¹⁷ Ka 'ngú ango-o, Ebhe Ngámá apa pi uo me:

«Yi ze bhú ká omupagano maze,

yi adú ne uo bhú dabili bini de.

Yi abú 'kpa yi li 'he inde kala ma sisiti-e de,

abhomu-o ngama-a, ma tsia zíba yi.†

¹⁸ Ma adú ne 'dyi yi,

yi tsia dú ne ongisi gba ma.

Ngámá Angbamili apa mo-o.†»

7

¹ Ondaise ma na mukunda, Ebhe apa me engú inde ni apa me ni améne e pi ní-e, ni améne mamene. † nde lie mo-o, a ayo me ní vulu liní bhú ndu osisiti 'ngú inde ngato zibotu li kute ní ne bua ní-e hana. Ní

† 6:16 6:16 Tsia bhú Lev. 26:11-12; ne bhú Edj. 37:27; di ne bhú Djlm. 32:28. † 6:17 6:17 Tsia bhú Isa. 52:11; di ne bhú Edj. 20:34, 41. † 6:18 6:18 Tsia bhú 2 Sam. 7:8, 14.

mene ne kpéke me ní dũ bubu kala Ebhe ne namanga ani mamanga.

Polo akpi ndjili ka li omabhuka na gudhu na Kolito adji bua o lie-o

² Ondaise ma, yi 'o ya li bua yi! Ya amene siti 'ngú li pabili gba kpála bini de. Ya a'e kpála bini li kpadji gba Ebhe-e de. Ya ha 'he ka kpála bini bhú napite ani de. ³ A ko de me ma ngapa 'ngú bhomu-o ngú na'o mangimbo pi yi-e de. A maka ma de apa lie-o, ya ne mukunda pi yi naali. Ehe bini gbó bhusu mukunda ya nde ne e pi yi-e de, abana i dũ nakpi, abana i dũ me ní nde bhú mukobho. ⁴ Yi ne kpúkpú na bua ma. Ma ne gindaginda naali li 'ngú gba yi-o. Bhú ndũ likabhu ya ngazu e hana, ya gie liya ne sidi de, ya abedhe mangbo ne djali bedhe.

⁵ A ko paká, abana nedhinga ya akolo lie bhú Make-donia, ya sia belegu nedhinga bedi ngú naguo de. Ya asia okpekpeke da 'ngú ne ndũ pasu hana. Ya dũ ne guo 'ngú sũnda ya ne okpála koko de, ya atsia adũ ne tsulu. ⁶ Engú bini, Ebhe inde atoto masi bhú okpála inde andala-a, abedhe matá ya ne masi li nedhinga li Tito agie lie lie-o. ⁷ Ya bedhe bha ne masi ka nago ka ani-e de, engú bini, ngali ani akpokpo e pi ya-a ato di masi bhú ya ngae. Ani akpokpo pi ya lele maka yi ato masi bhú ani lie-o. Ani akpokpo pi ya me yi abedhe ne gumu nau ma bedhe. Ani apa me yi ngakina liyi ka osisiti 'ngú yi amene e-o. Ani apa me yi ne gumu nago nateteke ma bhú egú ma ngagu e ne obhulu yala gba ma-o. Ma adje lie mo-o, ma abedhe matá ne djali bedhe.

⁸ Ma ambila me balua* inde ma aye nako e pi yi-e aha

* 7:8 7:8 Balua: A ko balua na bini gba Polo pi omabhuka na Kolito de. A ko balua inde ani aye e atsia angita-o.

babuma pi yi naali. Ma ti nako da nadge likabhu li bua ma tété, padhá de anga, ma ambila me balua bhomu-o aha likabhu pi yi ngu nedhinga bedi. Engu bini, bua ma ne likabhu tété mbia inde-e ade.

⁹ A na paká me, ma mangbo ngakpi djali. Ma kpi djali ango-o ka babuma yi asia e ka ma-a de. Engu bini, ma ngakpi djali anga babuma yi asia e amene me yi dji bua yi. Babuma yi asia e bhomu-o, yi asia li lele maka li Ebhe akunda lie-o. Inde lie mo-o, ya mene yi sisiti de. ¹⁰ Padhá de, anga li kpála sia babuma li bua e li lele maka li Ebhe akunda lie-e, babuma ango-o há pi ani nadjí bua e. Ani dji bua e-e, ani tsia kóbho. Ya ti da nadge likabhu li bua ya tété lele pi? Engu bini, li kpála sia babuma li bua e, i du me ani nde dji bua e de-e, bhobhomu-o ngagbele pi ani nakpi.

¹¹ Babuma yi asia e, yi asia li lele maka li Ebhe akunda lie-o. Yi tsia nga obabadha 'ngu inde li babuma ango-o azu e bhú yi-o: a ngaha pi yi me yi du ne bádha bua ngu naleke 'ngu sunda yi má gala! Yi asuno mbámbá me yi li bhú siti 'ngu de.† Yi ngake 'ngu liyi li siti 'ngu ango-o. Yi ne tsulu li 'ngu inde li siti 'ngu ango-o ti da nazu e-o. Yi abedhe ne gumu nau ma di ne namene engu li lele maka li Ebhe akunda lie bedhe. Yi bedhe ngu na'o 'ngu pí kpála inde amene siti 'ngu-o. Yi apana mbámbá me ngayi makpe-e, yi li bhú 'ngu bhomu-o de.

¹² Li ma ye balua pi yi-e, ma ye ka 'ngu gba kpála inde amene siti 'ngu-o de. Ma ye di ka 'ngu gba kpála bhe u amene siti 'ngu li e de. Ma aye mangbo ngu nasuno me yi mbila mbámbá kala Ebhe me yi ne mukunda pi ya li bua yi naali. ¹³ Kaka-a, engu yi amene e akθ bua ya kuto.

† 7:11 7:11 Tsia bhú 2 Kol. 2:5-11.

Bua ya kə bha kuto ngae de, ya akpi di djali naali ka nau me Tito adu ne djali naali ka li ndu yi hana ato masi bhú ani lie-o. ¹⁴ Nedhinga ma atima ani lie agba yi-e, ma akpo 'ngú yi pi ani ndjindji. Mbia inde-e, yi tsia ha numu mu ma de. Maka ya akpokpo nako lie pi yi kukulu 'ngú ndu 'kpí hana-a, ndu babadha 'ngú ya akpokpo e li 'ngú gba yi pi Tito asuno me a ko kukulu 'ngú. ¹⁵ Nedhinga ani akolo lie agba yi-e, yi asia ani ndjindji. Ndu yi hana, yi amanga ani naali, yi au ani ne tsulu, yi atsia adu amene engú maka ani akunda lie-o. Ani bhundja engú bhomu-o, ani bédhe matá ne mukunda pi yi bedhe. ¹⁶ Ma ne djali, anga yi ne kpúkpú na bua ma bhú ndu 'ngú hana.

8

Polo ato masi bhú omabhuka na gudhu na Kolito me u teteke ondaise o na Yelusalema

¹ Ondaise ya, ya akunda me yi mbila engú inde li Ebhe amene e bhú bádha bhú 'bu gba e pi okpála na oDadjua gba Ebhe na Makedonia.* ² Omabhuka inde oo azu nani likabhu naali, engú bini, u abedhe ne djali bedhe. U adu nani bhú ndibhili naali, engú bini, u du atsia bhúla 'he pi okpála de. ³ Ma au ne djila ma makpe. U apu 'he nakpata lele ehe inde adu ka uo-o. U apu belegu 'he nane dada mane. U aha bhú ngu o, okpála kata uo tété gandji de. ⁴ U akikiliki lio pi ya naali me ya asuno bádha bhú 'bu pi o, ngubula me o to 'kpa o pi omabhuka na Yudaya ne natima tia pi uo. ⁵ Ehe inde u amene e ane bhende ya adu nabhundja e-o. U aha ngaiza lio libhomu ngubula kulu gba Ngámá Yesu. U atsia aha di lio ngu nateteke ya nakpata lele maka li Ebhe akunda lie-o.

* 8:1 8:1 ODadjua gba Ebhe na Makedonia: A ko obhende bhú Filipoi, Tesalonike ne Beloya-o.

⁶ Kaka-a, ya ayo ka Tito ne kekele me aní gie lie agba yi ngú nandjia dú kulu na bádha bhú 'bu inde aní akpo naní lita e ko. ⁷ Yi ne obhulú tia kala Ebhe nane okpála koko. Nabhuka gba yi-e kpekpeke. Yi ngakpokpo Bádha Ngali gba Ebhe-e ndjindji. Yi mbila 'ngú gba Ebhe-e ndjindji. Yi aha líyi libhomu ngú kulu gba Ebhe-o. Yi ne mukunda naali lí pabíli gba ya. Ka 'ngú ango-o, yi mene ne kpéke me yi dú ne obhulú tia lí kpadji na ngua bádha bhú 'bu bhomu-o.

⁸ Engú inde ma apa e pí yi bhomu-o, a ko de me ma aha pí yi maka líli-e de. Ma apa mangbo pí yi, ngubula nasuno lele maka lí oDadjua gba Ebhe koko amene lie-o. I dú me yi nde akpata lele maka u amene lie-e, yi súno me mukunda gba yi-e di kukulu. ⁹ Padhá de, anga yi mbila bádha bhú 'bu gba Ngámá gba ní Yesu Kilisito hana. Ngaani kpála inde adu bhulú tia, aní a'o lie bhulú ndibhíli ngú nateteke yi. Aní amene mo-o ngú napa me, bhú ndibhíli gba ní-e, yi kolo obhulú tia kala Ebhe.

¹⁰ Ma ngaha pí yi mabhundja gba ma píndji napu 'he pí omabhuka inde bhú ndibhíli-o. Bhú kalanga inde akodho 'kpi-e, yi adu nako okpála na kalanu ngú napu 'he. Yi dú bha bini kalanu bhú napu 'he de, yi adu di ne okpála na kalanu nabhundja 'ngú ango-o. ¹¹ Kaka-a, mbia inde-e, yi ndjia kulu bhomu-o ndjindji. Yi 'o bua yi ngú nanu ne 'ngú ango-o ne kalanu akolo a lí soso, ne mukunda inde yi adu naní ne e ngú namemene, nakpata lele ehe inde ka yi-o.

¹² Padhá de, anga i dú me yi nde apu 'he pí Ebhe ne bua yi bini-e, Ebhe ngaziziba bha bini lí lele bhende ka yi-o. A ko de me Ebhe nga'o 'to e me yi pu pí ní ehe bhende ka yi ade-e de. ¹³ A ko de me ma akunda na'o líkabhu gba okpála koko pí 'ngbu yi ngú nato yi bhú ndibhíli-e de. A

ko mangbo me ndu yi hana yi du ne 'he inde ati ne yi-o. ¹⁴ Mbia inde-e, ehe ka yi bhelé. Kaka-a, yi ti da nateteke okpála bhende bhú ndibhili-o. Ekpí koko-o, yi du di bhú ndibhili me ehe nde ka uo bhelé-e, u ti da nateteke di yi. Li ndu yi hana tsia du ne 'he inde ati ne yi-o. ¹⁵ A maka u aye lie bhú bhuku gba Ebhe-e me:

«Okpála anu ngú nalo mana.

Okpála bhende alo bhelé-e, u azu lie, ale ne uo.

Okpála bhende i lo bhelé de-e, u azu lie, ale bhadi ne uo.†»

Polo atima Tito ne obi e nalo tia

¹⁶ A ayo me ní dhogö Ebhe inde a'o li bua Tito me ani nu teteke yi maka ya amemene lie-o. ¹⁷ Tito aziba engú inde ya ayo e ka ani-o. Ani ziba bha bini 'li ya de, engú bini, ani aziba ne bua e makpe me ni nu agba yi anga ani ne mukunda pi yi. ¹⁸ Ya atima ani di bhú dabili bini ne ndai ní, inde li oDadjua gba Ebhe-e ngadhogö e kabula kulu inde ani ngamene e ngubula Bádha Ngali-o. ¹⁹ La matá di-e, oDadjua gba Ebhe abhu ani ngubula me ya anu ne uo bhú dabili bini ngú namene kulu na bádha bhú 'bu inde. A ko kulu inde a ayo me ní mene e ngú naha sangu pi Ngámá gba ní ngae makpe. Abhomu-o, i tsia súno di pi okpála bádha bua gba ní-o. ²⁰ Otia inde ya apo bhúla e-e bhelé. Kaka-a, ya ngalilila ndjindji ngubula me okpála apá 'ngú na sisiti li ya tété de. ²¹ Ya ngagili ne kpéke me ya mene engú inde babadha bhú djila Ngámá gba ní di ne bhú djila ndu okpála hana.

²² Ya di ngatima suka ndai ní bini bhú dabili bini ne obhe bhisi bhomu. Ya ale ani bhutsibhutsi, ya atsia au me ani ngaha lie ndu 'kpí hana ngú kulu gba Ebhe-o. La mbia inde-e, ani matá ngaha lie ane mane anga ani

† 8:15 8:15 Tsia bhú Eki. 16:18.

ngambila ndjindji me yi ne kpúkpú na bua ni. ²³ La pi Tito-o, a ko kpála inde ya ngamene kulu ne e bhú dabili bini. Ya ngamene kulu ne ani bhú ká yi bhú dabili bini. Okpála bhe bhisi inde adhuku ne ani-e, okpála na oDadjua gba Ebhe-e atima uo ngao. U ngamene kulu ngú naha sanganu pi Yesu Kilisito. ²⁴ Kaka-a, yi suno mukunda gba yi-e pi uo ne bua bini. Li okpála na oDadjua gba Ebhe-e aú lie mo-o, bhobhomu-o súnó pi uo me ya pa 'ngú gba yi-e bhú djila uo bhú eu de.

9

Ebhe ne mukunda naali pi okpála inde ngapu 'he ne djali-o

¹ Tata ngú napa me ma ye 'ngú pi yi pindji kulu gba ní nateteke omabhuka inde bhú ndu doto na Yudaya ade. ² Padhá de, anga ma mbila bádha bua yi nde ne e pi uo hana. Ma ngapa 'li ma tété de ondaise ní na Makedonia* me, «ngayi ondaise ya na Akai, yi bedhe ngú nateteke omabhuka na Yudaya, nayie bha bini bhú kalanga inde akodho 'kpí-o.» Li okpála na Makedonia adje lie mo-o, okpála bhelé bhú ká uo asia di gumu nanu nateteke uo.

³ La-a, ma ngatima ondaise ní bata agba yi ngú napa me yi po bhúla tia bhomu-o kalanu maka ma apa nako pi okpála koko lie me yi améne mamene-o. Abhomu-o, nedhinga ya akólo lie agba yi-e, engú ya apa e pindji yi pi uo-o, akóto eu de. ⁴ Ne ma ne okpála na Makedonia, li ya kolo agba yi, ya bhaka me yi nde nga bedhe ade-e, numu méne ya naali. Ma ambila la bhadi me numu bhe gba yi-e dú la matá bhe nane mane, anga ma apa pi uo me yi bedhe. ⁵ Kaka-a, ma au ndjindji me ma yo ka ondaise ní

* 9:2 9:2 ODadjua gba Ebhe na Makedonia: A ko obhende bhú Filipoi, Tesalonike ne Beloya-o.

inde-e me, u nu pi ya agba yi kalanu ngú napa me u holo napo bhúla tia inde yi apa nako me yi ahá e-o. Abhomu-o, tia bhomu-o adú bedhe ngú nadjেকে nakolo ka ma-o. A tsia súno me yi ngahaha ne bádha bua, yi ha ne siti bua de.

⁶ Yi mbila ndjindji me: kpála inde alu ezú bedi-e, ani asía bhadi bedi. Kpála inde alu ezú bhelé-e, asía bhadi bhelé! ⁷ Kaka-a, a ayo me kpála ne kpála ha maka ani abhundja lie-o. Ani apú ne bua na bhisi bhisi de, ani apú di de me anga u aholo ni tété ne kpéke-e de. Padhá de, anga Ebhe ne mukunda pi kpála inde ngapú 'he ne djali-o. ⁸ Yi mene mo-o, Ebhe ne angu ngú nabedhe yi ne ndu bádha bhú 'bu hana, ngubula me yi du ndu 'kpí hana ne ndu 'he hana inde yi nde ne gumu e ngú mukobho gba yi-o. I du mo-o, yi du di ne 'he inde yi ti da na'o e li tula ndu obabadha kulu hana. ⁹ A maka u aye lie bhú Bhuku gba Ebhe-e li 'ngú gba kpála inde ngbingbili-e me: «Kpála inde ngapú 'he pi obhulu ndibhili ne bua e bini-e,

bádha 'ngú gba ani-e ngadu duduma ne duduma.†»

¹⁰ Ebhe ngaha nguwa pi okpála ngú nalulu, di ne mapa ngú nazuzu. I nde lie mo-o, ani ahá ndu nguwa yi nde ne gumu e hana pi yi. Ani tsia méne di me a bhele ngubula me yi du napu 'he ne kalanu. ¹¹ Ebhe améne me yi du ndu nedhinga hana ne obhulu tia ngubula me yi du napu 'he ndu 'kpí hana. Abhomu-o, li okpála bhelé gé heni pi Ebhe li ohe inde ya ahá e pi uo ne 'li yi-o. ¹² Padhá de, anga ehe yi apú e téteke bha bini omabhuka inde bhú ndibhili-e de. A méne di me okpála bhelé gie heni pi Ebhe bhú mayo gba o-o. ¹³ U aú kulu yi ngamene e ne tata naali. Kaka-a, u agié heni pi Ebhe ngú nau me

† 9:9 9:9 Tsia bhú Ets. 112:9.

yi ngamanga Bádha Ngali gba Yesu Kilisito , di ne me yi ngagbo bhúsu 'he gba yi-e ne o, di ne okpála koko. ¹⁴ U asúno mukunda gba o-o pí yi bhú nayo Ebhe. U améne mo-o, anga bádha bhú 'bu gba Ebhe-e amene me yi bhulu 'kpa yi pí uo. ¹⁵ A ayo me ndu okpála hana dhogθ Ebhe ngú bádha 'ngú gba e inde ane mane-o.

10

Polo agie 'ngú pí okpála inde nga'o 'ngú pí ani-o

¹ Ngama Polo-o, ma ngayo ka yi engú bini, ne 'li Yesu Kilisito kpála na bhuku 'ngú di ne bádha 'ngú-o. U ngapa li ma me ní du ne yi bhú dabili bini-e, ma ngakθ lima ne kuto, i du la me ma nde tsutsu-o, ma ngagama okpekpeke 'ngú pí yi bhú obalua gba ma-o. ² Engú inde ma ngayo e ka yi-e, ma ngayo ka yi me, yi atíma ma de me ma gama okpekpeke 'ngú pí yi nedhinga ma akólo lie agba yi-e de. Okpála koko bhú ká yi ngabhundja me ya ngamene 'ngú maka okpála na doto. La-a, pí okpála bhomu-o, ma asúno angu gba ma-a pí uo masuno.

³ A na paká me ya ne okpála-kuti, engú bini, ya ngagu gbele maka okpála-kuti ade. ⁴ Bhú gbele ya ngagu e-e, otia 'gú ya ngagu gbele ne e-e, a ko obhende na píla doto inde-e de. A ko okpekpeke tia 'gú inde ayie ka Ebhe. Otia 'gú bhomu-o ne angu ngú nabhili okpála inde ngagu Ebhe-o. Ya ngani ne di 'bhθ obhulu eu inde ngagbe kpekebθ-o. ⁵ Ya ngaha angu eu gba uo inde ngamene me u abhúka Ebhe de-o. Ya ngagili nadjí mabhundja gba uo-o ngubula me u manga Yesu Kilisito. ⁶ Nedhinga yi apána lie me yi ngamanga ya maka a ayo lie-e, ya 'ó 'ngú pí ndu okpála koko hana inde i kunda namanga ya de-o.

⁷ Yi tsia 'ngú maka inde lie-o. Li okpála koko bhú ká yi pa me o ne okpála ka Yesu Kilisito-o, a ayo me u mbila me

ya di ne okpála ka Yesu Kilisito maka uo. ⁸ Angu li Ngámá Yesu Kilisito aha e muma-a, a ngubula me ma teteke yi ne di. A ngubula nabhili yi ade. Nedhinga koko-o, ma ne gindaginda tété naali, ma dje numu tété de. ⁹ Ma kunda de me yi holo nabhundja me ma ngakunda nabu tsulu li yi, ne obalua gba ma, ma aye e pi yi-e de. ¹⁰ Padhá de, anga okpála bini bini ngapa me: «Li Polo ye balua pi ní-e, ani ngaye okpekpeke 'ngú, a ngandjia angu ní mandjia. Engú bini, ani kolo bhú ká ní ngae makpe-e, ani holo naguku, ani lé nagama 'ngú pima.» ¹¹ A ayo me okpála inde ngapa ngua 'ngú bhomu-o mbila me, engú inde ya ngaye e bhú obalua gba ya me ya nde de yi tsutsu-o, ya kolo gba yi-e, ya améne bha maka ya aye lie pi yi bhú obalua-o.

¹² Okpála bhomu-o ngau lio ne bhú lá naali. Ya pá de me ya viti ne uo bini-e de, ya kpó 'ndji ya ne uo de. A ko ongingi. U ngapima lio ngao makpe, u ngakpo 'ndji o li kute o makpe. ¹³ Li pápá gba ya-a, ya ti da napa 'li ya nane dada mane de. Nedhinga li Ebhe amba bhú la ya lie ne kulu agba yi-e, ani atsia akodho kozie tété. Ya apise bha ne kulu gba ya li kozie ango-o. ¹⁴ Ya gó nani ne Bádha Ngali gba Yesu Kilisito agba yi de-e, u de apá li ya me ya agulu kozie gba ya-a agulu. Engú bini, i nde la lie me ya nde ne okpála na kalanu ngú nanu ne Bádha Ngali pi yi-e, bhobhomu-o asuno me ya gulu nga kozie gba ya-a de.

¹⁵ Kaka-a, ya pá 'li ya li kulu inde li okpála koko amene e de. Engú bini, ya ne gumu me nabhuka gba yi-e be ndu e, ngubula me kulu gba ya bhú ká yi-e be di ndu e. Ya abhundja me ya ne nga bili inde li Ebhe apa me ya pise lie de. ¹⁶ Pipita-a, ya ti da nasia kpadji ngú nanu ne Bádha Ngali-e bhú ondu doto koko. Ya kunda napa 'li ya li kulu li okpála koko amene e ngao li bili li Ebhe atima uo lie de.

¹⁷ Padhá de, anga Bhuku gba Ebhe-e apa me: «Li kpála kunda napa lie-e, a ayo me ani de pa bha bini li engú inde li Ebhe Ngámá amene e-o.†» ¹⁸ Padhá de, anga a ko de me Ebhe ngaziba okpála inde ngapa 'li o ngao makpe-e de. Engú bini, ani ngaziba obhende anga li ani-o.

11

Polo akpo 'ndji e ne okpála inde ngabhi 'kpa o pí mbulu o me o ne obhulu titima-o

¹ Yi ti da nadu ne 'ndjá bua muu, ngubula me ma gama mbo 'ngú maka bhulu pele! A moko, yi du ne 'ndjá bua muu. ² Padhá de, anga ma ne botolo ngú yi ndu nedhinga hana, maka li Ebhe nde di lie ne botolo ngú yi-o. Ma ngatsia 'kpí li yi ndjindji ngubula me yi du bubu ngú kava. Bhoko na kava ang-o, a ko Yesu Kilisito. ³ Yi bhundja me kpulu apite nani Eva, ani atsia ayie li bádha kpadji. Kaka-a, ma ngakpe me kpála bini agó apite yi de ngubula me mukunda gba yi pi Yesu Kilisito ndjia.

⁴ Ma ngapa mo-o, anga li kpála bini go agba yi-e, yi bedhe ngú nabhuka ani má gala! Engú la li kpála ang-o ngakpo e li 'ngú gba Yesu, ne li 'ngú gba Bu Bhobua, la di ne li 'ngú na Bádha Ngali-e kpi ne bhende ya asuno e pi yi-o. ⁵ Yi ngabhundja me okpála bhomu-o ne ongbengbe obhulu titima. La ngama-a, ma bhundja de me u ane ma-a de. ⁶ A na paká me pi yi-e, ma mbila nagama 'ngú bhú ká okpála ndjindji de. Engú bini, li pápá nambila Ebhe-e, ma mbila ani ndjindji. Ya asuno engú ang-o pi yi mbánbá bhutsibhutsi bhú ndu 'ngú hana inde ya amene e-o.

⁷ Nedhinga ma akpokpo Bádha Ngali gba Ebhe lie pi yi-e, ma dha bhú yi de. Ma akθ lima ne kuto ngubula me

† 10:17 10:17 Tsia bhú Djlm. 9:23; di ne bhú 1 Kol. 1:31.

yi **u** ne bhúlá. Bhobhom**u**-o apa me ma amene sisiti? A mo-o ade. ⁸ Ma ad**u** lie oo-o, ma aziba me oDadjua koko bi mukobho gba ma ngao. Ma abha otia na oDadjua angoo ngú nateteke yi nedi! ⁹ Oo-o, ma dha bhú kpála bini bhú ká yi de, li ma ad**u** lie ne gum**u** tia-o. Engú bini, omabhuka na Makedonia ago m**u**ma ne ehe inde ma ad**u** ne gum**u** e ngao. Ma alila lima bhú nd**u** 'ngú hana me ma adú pí yi maka tili kílí de. Ma ayó la di galikpe ehe li yi de.

¹⁰ Ne 'li Yesu Kilisito inde bhú ma-a, ma ngapa pí yi kukulu 'ngú: ma ne gindaginda naali anga ma nde ha 'he ka yi de. Bhú ndu doto gba yi na Akai libhomu-o, kpála bini ti da nayoko ma de me ma adú ne gindaginda tété de-e de. ¹¹ Ma kunda nad**u** tili kílí pí yi de ka ní? A ko anga ma ne mukunda pí yi adi? Ebhe apá bhobhom**u**-o li ma ngae! ¹² Ma adú bha maka ma nde lie inde. Ma ziba tia ka yi de, ngubula me okpála bhe i ngabhi 'kpa o pí mbulu o me o ne obhulu titima aú kpadji ngú napa 'li o de me o bhadi ngamene kulu maka ya-a de. ¹³ Okpála angoo, ngapite okpála. U ngamene 'he mugito me a ko obhulu titima gba Yesu Kilisito. ¹⁴ Engú angoo ahá nangamba pí ní de, anga Satana ngae makpe ti bhadi da namene 'he mugito me a ko andjelu na zi 'kpí. ¹⁵ Kaka-a, li okpála na kulu gba ani-e mene 'he lio mugito me a ko kukulu okpála na kulu gba Ebhe inde ngbingbili-e, ní angamba tété de. Engú bini, li sokpí-e, u asía galikpe engú inde ati ne kulu inde u amene e-o.

Polo apa 'li e li olikabhu ani azu e-o

¹⁶ Ma matá ngapapa ne toto, kpála bini apá li ma de me ma ne bhulu pele-e de. I du me okpála nde abhundja me ma ne bhulu pele-e, yi de ziba me ma ne bhulu pele ngú napa me ngama di-e ma pa mbo 'li ma bedi. ¹⁷ Engú

ma adji apa inde-e, a ko de me ma adji napapa maka li Ngámá akunda lie de. Ma adji napa maka li bhulu pele agagama 'ngú lie-o. ¹⁸ Maka li okpála bhelé ngapa 'li o lie li ongu na doto-o, ngama di-e ma apá bhadi 'li ma tété moko. ¹⁹ Ngayi okpála na imbilang-o, yi dje obhulu pele ngagama 'ngú-o, yi ngadje uo ne 'ndjá bua! ²⁰ Yi ngakibila me okpála bhomu-o mene yi mgito me yi ne obalise. Yi ngakibila me u zi ohe gba yi-o. Yi ngakibila me u pite yi. Yi ngakibila me u u yi padhá. Yi ngakibila me u su bhula yi. ²¹ Yi mbu li ya, anga ya adu nani bhubhuku ngú namene mo-o! Ma ne numu naali ngú napapa!

Mbia inde-e, ma adji agáma 'ngú maka bhulu pele. Engú inde li okpála koko ngapa 'li o lie, ma apá nga bhadi 'li ma tété. ²² U ngapa me o ne omaYuda, ma di ne maYuda. U ngapa me o ne omaſalaele, ma di ne maſalaele. U ngapa me o ne odi Abalahama, ma di ne ye Abalahama. ²³ U ngapa me o ne okpála na kulu gba Yesu Kilisito. Mbia inde-e, ma agama 'ngú maka bhulu pele. Ma belegu ngamemene ane uo mane. Ma mene kulu ango-o ne ndala de. Ma ali bhú tikpu ane uo mane. Ma azu bhikpa ane uo mane. Ma akolo masikpe de nakpi bhutsibhutsi bhelé.

²⁴ Ma adu azu fimbo ndjikpa bata ne ká odukpabini, bhutsibhutsi bhuluvue sakpa ongámási gba omaYuda-o. ²⁵ Ongámási gba okpála na Loma abhi ma ne fimbo bhutsibhutsi bata. Okpála atutulu ma ne teme bhutsibhutsi bini ngú nabhelo ma. 'Ngbé zabu alinda ne ma bhú 'ngu bhutsibhutsi bata. Ekpí bini, ma alipila bhú 'ngu, ma asi di bhúbhú.

²⁶ Bhú odhuku ma adu adhuku e naali-e, ma adu ne tsulu ka nasi ka engu. Ma adu ne tsulu ka obhulu nagbulu 'he gba okpála ne kpéke. Ma adu ne tsulu ka

ondaise ma omaYuda, la di ka obhende ne omaYuda ade-o. Ma adu ne tsulu bhú gudhu, di ne bhú omili bili. Ma adu ne tsulu pí 'ngbé 'ngu. Ma adu ne tsulu ka okpála inde ngapa me o ne omakilisito, a nde la mo-o ade-o. ²⁷ Ma amene kulu kpekpeke. Ma asi ndi 'la bhutsibhutsi. Ma adje gumu bhú dabili bini ne gumu 'ngu. Bhutsibhutsi bhelé, ma sia kpadji nazu 'he de. Bongo du ka ma bhelé de, ma atsia adu adje zini. ²⁸ Olikabhu ma azu e bhelé, ma ti da nakpokpokpo hana de. Engú bini, engú inde li bua ma ngalu pí e, a ko nabhundja oDadjua gba Ebhe-e ndu 'kpí hana. ²⁹ Li kpála bini du bhuhuku li kpadji gba Yesu-o, a ngamene ma sisiti mugito me a ko ma. Li kpála bini ti bhú siti 'ngú-o, a ngamene bua ma sisiti naali.

³⁰ I du me a nde a ayo me ma pa 'li ma-a, ma apá bha bini li ongu inde ngasuno me ma bhuhuku-o. ³¹ A ayo me okpála dhogó Ebhe inde 'Dyi Ngámá Yesu-o duduma ne duduma. Ani mbila hana me engú inde ma adji apa e pi yi inde-e, a ko eu de. ³² Yi tsia nga engú inde ngasuno me ma bhuhuku-o. Ekpí bini, nedhinga ma adu lie bhú gudhu na Damasi-e, ngámá na kuti bhomu-o, adu 'li ani me Alitasi. A adu ka ani ne guvelenele bini inde adu atsia 'kpí li gudhu bhomu-o. Ani a'o nani okpála gba e li okpadji nali bhú gudhu bhomu-o ngu napa me u u ma-a, u de holo ma. ³³ Engú bini, okpála gba Ebhe-e ato ma bhú бага, u agbite ekpú tété, u atsia akó ma ne di li malilisa na aga asa kuti libhому-o. Ma atsia akobho sakpa ani.†

12

Polo apa 'li e pindji angu inde li Ebhe ngaha e pi ani bhú bhuku gba e-o

† 11:33 11:32-33 Tsia bhú Kul. 9:23-25.

¹ A ayo me ma pa matá 'lì ma ne kalanu, abana lì tata nde lie tété ade-o. Kaka-a, ma adji nagama 'ngú pindji ongú lì Ngámá Yesu asuno e muma, aní atsia ambamba di ta e muma-o. ² Ma ambila kpála bini* inde agbite lie lì Yesu Kilisito . A ane nga kalanga ndjikpa ne ká badha, Ebhe a'e kpála bhomu-o abhúlá agba e, aní atsia agie aní kuto ei. Ma mbila de ne me aní aloto nani maloto, ne me Ebhe a'e aní abhúlá na paká. Ebhe ambila bha ngae, ma mbila naama de. ³ Ma apá matá ne toto, ne me aní aloto maloto, ne me Ebhe a'e aní abhúlá na paká. Ma mbila de, Ebhe ambila bha ngae.

⁴ Ebhe a'e kpála bhomu-o abhú kuti na mundeysi . Oo, aní atsia adje ongú inde lì kpála-kuti ti da nakpokpo kú e de. ⁵ Ma ti da napa 'lì ma lì 'ngú akolo lì kpála bhomu-o. Engú bini, pindji ongú bhe atsia ma makpe-e, ma ti da napa 'lì ma bha bini lì engú inde ngasuno me engú bhú ma ade. ⁶ La-a, i dú me ma kúnda napa 'lì ma u-o, ma de dú ne bhulu pele de. Padhá de, anga ma de apá kukulu 'ngú. Engú bini, ma kúnda napa 'lì ma de, anga ma kúnda de me okpála u ma mugito me ma ne 'ngbé kpála-a de. Ma akúnda mangbo me okpála manga ma ka ongú inde u ngadje ma me ma ngapa e ko.

⁷ A ayo nako me 'ndji ma be naali ka ongú na ngangamba inde lì Ebhe ambamba ta e muma-o. La-a, ngú napa me 'ndji ma abé naali de-e, Ebhe a'o ehe bini na ke make lì kute ma. Ehe ango-o maka bhulu titima gba Satana . A ngabhi ma, a di ngayoko ma me ma abédhe ne 'ngbé 'ndji bedhe de. ⁸ Ma ayo ka Ngámá bhutsibhutsi bata me aní gbegbe ma bhú likabhu bhomu-o. ⁹ Aní agie muma me: «Ma ngaha bádha bhú 'bu gba ma-a pi mu

* 12:2 12:2 Ngú nambila kpála inde lì Polo ngakpo 'ngú gba e si-e, tsia lukuluku 7.

ngubula me a teteke mu ngú nakibila likabhu bhomu-o. Padhá de, anga nedhinga li kpála nde lie bhubhuku-o, a bhomu-o nedhinga inde li angu gba ma-a ngamene kulu lie bhú kpála bhomu libhomu-o.» † nde lie mo-o, ma akunda mangbo me ma pa 'li ma li ongu inde ngasuno me ma bhubhuku-o, ngubula me angu gba Yesu Kilisito mene kulu bhú ma.

¹⁰ Kaka-a, ma tété ne djali li nedhinga ma nde lie bhubhuku-o. Abana li okpála sobho ma, abana ma zu likabhu, abana u to mbolo li ma, abana ma kibila olikabhu bhomu-o hana kabula 'li Yesu Kilisito-o, ma tété ne djali, anga nedhinga li angu nde lie bhú ma ade-e, a bhomu-o nedhinga ma nde lie kpekpeke-o.

Polo alopole lie li 'ngú gba omabhuka na gudhu na Kolito

¹¹ Ma agama 'ngú bhomu-o mugito me ma ne bhulu pele. La-a, yi akata ma tété ngayi. A ayo me yi kpo 'ngú gba ma-a ngayi. Padhá de, anga abana ma du ne kpála na padhá-a, me obhende yi nga'i o me a ko ongbengbe obhulu titima bhomu-o, u ne ma ne 'ngbé de. ¹² Okulu inde-e ngasuno me ma ne bhulu titima, ma amene bhú ká yi ne 'ndjá bua. Ongú ango-o, a ko ongamba 'ngú inde li Ebhe amene e-o. ¹³ Ongú bhende ma amene e pi obi yi omabhuka na Dadjua koko me ma nde mene agba yi de-e ngae dho? Belegu de bini! Ehe inde ma mene e agba yi de-e, a ko bha bini ma dha lie bhú yi de-o. Yi suno bádha bhú 'bu mu ma li siti 'ngú ma amene e li yi bhomu-o!

¹⁴ Mbia inde-e, ma ngakunda nanu agba yi bhutsibhutsi na bata. Abana ma nu agba yi bhú dhuku inde-e, ma dhá bhú yi de. Ma ngakpata mangbo yi, ma kpata tia gba yi-e de. Yi mbila ndjindji me a ayo de me ongisi po tia pi okpála azu o de. A ayo mangbo me

odyi ongisi, ne ohi ongisi po tia pi ongisi gba o-o. ¹⁵ Li pápá gba ma-a, abana ma pu ndu 'he inde ka ma-a hana ngubula yi, abana ma pu mukobho gba ma-a ngubula yi-e, ma dú bha tété bhú djali. Ma suno mukunda pi yi naali mo-o, yi tsia súno mukunda muma bedi?

¹⁶ Ndu yi hana yi mbila ndjindji me ma dha nako bhú kpála bini bhú ká yi de. Engú bini, okpála koko bhú ká yi ngapa me: «Polo ne bhulu kali! Aní abha tia gba ní-e bhú nyali.» ¹⁷ Ma apite yi lele pi? Ma azi yi li kpadji gba suka okpála ma atima o agba yi-e? ¹⁸ Ma ayo ka Tito ne kekele me aní nu agba yi. Ma atima di bhú dabilí bini ne aní ndai ní inde yi mbila e ndjindji-o. Tito akolo lie agba yi-e, aní aha 'he li yi bhú kali? A mo-o ade! Ehe inde li Tito amene e ne bhende ma amene e-e, aviti bha bini, bua ya ne aní bhú dabilí bini.

¹⁹ Nedhinga koko, nayie nani bhutode yi ngabhundja me ya ngagili nabubuku nganda ya bhú djila yi. A mo-o ade! Ya mangbo ngakpokpo 'ngú inde-e kala Ebhe maka li Yesu Kilisito akunda lie-o. Ondaise ya, ya apa ndu ongu bhomu-o hana pi yi, anga ya akunda nateteke yi me yi bhele li kpadji gba Yesu Kilisito-o. ²⁰ Ma ngakpe me nedhinga koko, li ma akólo lie agba yi-e, ma bhaka me yi ngakobho maka ma akunda lie de. Ma ngakpe di me lele dasundu gba ma-a ngá li yi de. Ma ngakpe me nedhinga ma akólo lie agba yi-e, yi du nagbe bhayiki sunda yi, yi du nadge gumu 'he liyi sunda yi, yi du nake 'ngú liyi sisiti, yi du nagbo bhusu yi, yi du nasobho li yi sunda yi, yi du napadha liyi sunda yi, yi du nadge kute yi, yi tsia du la di namene engú ngangá.

²¹ Ma ngakpe me nedhinga ma agó lie agba yi bhe na sidi-e, Ebhe gba ní-e ha numu muma bhú djila yi. Ma ngakpe me ma ku 'gbá ka okpála bhelé inde ngamene siti

'ngú ne kalanu maka nako u adu namemene lie kalanu-o. Okpála ango-o, u dji nga bua o ne toto li namene siti 'ngú de, u ngakunda olisi, i du di-e obhosi ngangá, u ngamene ndu sisiti 'ngú hana.

13

Polo agbele 'dje omabhuka na gudhu na Kolito ne toto

¹ A inde-e bhutsibhutsi na bata me ma go agba yi. A maka u aye lie bhú Bhuku gba Ebhe-e me: «Li kpála pa 'ngú li kilí e, a ayo mbo me okpála bhisi, i du di-e okpála bata de lu pí 'ngú ango-o. I du mo-o de, u kódho 'ngú tété de.†» ² Nako ma ago lie agba yi bhutsibhutsi na bhisi-e, ma agbele 'dje okpála inde adu namene siti 'ngú-o bhú dabili bini ne okpála koko hana. Mbia inde-e, ma nde lie tsutsu-o, ma matá ngagbele 'dje uo ne toto me nedhinga ma agó matá lie agba yi-e, ma djé ndjinga kpála bini bhú ká uo de.

³ Yi ngagili me yi u ehe inde ngasuno me Yesu Kilisito ngagama 'ngú bhú ma ngae-o. Ma asúno pí yi masuno. Yesu Kilisito bhú ká yi bhubhuku ade. Engú bini, ani ngasuno angu gba e bhú ká yi. ⁴ A na paká me nedhinga u abhi ani ne nyeli lie li kulusi-e, angu du bhú ani de. Engú bini, mbia inde-e, ani bhú mukobho ka angu gba Ebhe. Maka ya akpøtsø liya lie ne ani-e, ngaya di-e, ya bhubhuku maka ani adu nani lie-o. Engú bini, ya akpøtsø liya lie ne ani bhú mukobho gba e-e, lele nalili okpála ka ya bhú ka yi adú bhadi ne angu gba ani-o.

⁵ Yi tsia bua yi ngayi makpe ngú nambila me yi ngakobho maka omabhuka na paká. Yi mbila ndjindji me

† 13:1 13:1 Tsia bhú Det. 19:15; ne bhú Mat. 18:16; ne bhú 1 Tim. 5:19; ne bhú Ebe. 10:28; di ne bhú 2 Kol. 12:14.

Yesu Kilisito bhú ka yi. A mo-o adi? I dú mo-o de-e, u ú ehe inde ngasuno me yi abhuka de. La-a, a ko líkabhu i dú me aní nde bhú yi ade-o. ⁶ Engú bini, ma abhundja me yi mbíla ndjindji me, pí ya-a, okpála tí da nau ehe inde asuno me ya ne kúkulu obhulu titima gba Yesu Kilisito.

⁷ Ya ngayo Ebhe me yi améne siti 'ngú bini de ne nayala me ya lí yi. A ko de me ya ngakunda bhomu-o nasuno me angu ya akolo de. Engú bini, ya ngakunda mangbo me ya dú nau yi namene bádha 'ngú, abana i dú me a nde ngau líe me angu ya kolo de-o. ⁸ Padhá de, anga ya tí da nagu yi de, i dú me yi nde ngakpata nasuno na kúkulu gba Ebhe-o. I dú me yi nde amene mo-o, a ayo mangbo me ya teteke yi ngú nanu ne kalanu. ⁹ Ya ngakpi djali ndu 'kpí hana nedhinga lí ngaya-a, ya nde líe mandí angu, me a nde la bhú yi ne angu-o. Kaka-a, ya ngayo di bhú omayo gba ya-a me yi kolo ngbingbili ne ndu kpadji hana. ¹⁰ Ka 'ngú angu-o, ma ngaye ndu 'ngú bhomu-o hana pí yi nedhinga ma nde líe bhú ká yi ade-o. A ko ngubula me nedhinga ma akólo líe bhú ká yi-e, ma améne yi kpekpeke de ne angu lí Ngámá Yesu aha e muma-o. Angu angu-o ngateteke yi me Dadjua gba yi-e be ndu e ne kalanu, a ngubula nabhøbhølø mabhølø ade.

¹¹ Ngú nabu tata-a, ondaise ma, yi bedhe ne djali bedhe. Yi mene kulu ngú napa me yi dú ngbingbili ne ndu kpadji hana, yi to masi bhú yi sunda yi, yi dú bhú nadje líyi sunda yi, yi dú ne guo 'ngú sunda yi. Yi mene mo-o, Ebhe inde ne Ebhe na mukunda di ne guo 'ngú-o tsia dú ne yi bhú dabilí bini. ¹² Yi yi líyi sunda yi ne nakama líyi maka ondaise. Ndu ondaise ní inde ei-e hana apa me o yi yi ma yi. ¹³ A ayo me bádha bhú 'bu gba Ngámá Yesu Kilisito, ne mukunda gba Ebhe, la di ne nakpøtsø lío gba Bu Bhobua-a dú bhú dabilí bini ne ndu yi hana.

Gandja na Mbia

Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 25 Mar 2022

6b4904fb-f8ce-5931-8218-7cee8914232c